

MALAYSIA
DEWAN RAKYAT
ATURAN URUSAN MESYUARAT

NASKHAH SAHIIH/BAHASA MALAYSIA

<http://www.parlimen.gov.my>

HARI SELASA, 1 DISEMBER 2015, PUKUL 10.00 PAGI

Bil. 59

PERTANYAAN-PERTANYAAN BAGI JAWAB LISAN

1. PR-1333-L69946
Dato' Shamsul Anuar bin Haji Nasarah [Lenggong] minta **PERDANA MENTERI** menyatakan persediaan awal menghadapi bencana , dan apakah Kerajaan bercadang meminda beberapa peraturan berkaitan bencana yang tidak sesuai lagi digunakan masa kini.
2. PR-1333-L69800
Dato' Kamarudin bin Jaffar [Tumpat] minta **MENTERI PENGANGKUTAN** menyatakan sama ada Kerajaan berhasrat untuk menswastakan perkhidmatan kereta api laluan KL-Tumpat sebagai usaha terakhir untuk menghidupkan semula serta memajukan laluan tersebut.
3. PR-1333-L70506
Dr. Ismail bin Daut [Merbok] minta **MENTERI KEMAJUAN LUAR BANDAR DAN WILAYAH** menyatakan langkah-langkah Kementerian dalam mempertingkatkan ekonomi generasi belia yang berpendapatan rendah terutamanya yang tinggal di kawasan pedalaman, contohnya bimbingan atau nasihat berkenaan dana untuk mempertingkatkan pendapatan isi rumah mereka, baik secara perseorangan ataupun berkelompok.
4. PR-1333-L71123
Tuan Jeff Ooi Chuan Aun [Jelutong] minta **PERDANA MENTERI** menyatakan berapa banyak unit perumahan khusus diperuntukkan bagi Bumiputera di bawah projek Lembaga Kemajuan Wilayah Pulau Pinang (PERDA) yang tidak diduduki telah dijual atau disewakan kepada orang lain tanpa audit.
5. PR-1333-L69568
Datuk Sapawi bin Ahmad Wasali [Sipitang] minta **MENTERI PENDIDIKAN TINGGI** menyatakan sejauh mana pencapaian universiti-universiti awam di Malaysia dalam ranking dunia dan apakah langkah diambil untuk meningkatkan pencapaian menjelang tahun 2020.

6. PR-1333-L69759
Tuan William Leong Jee Keen [Selayang] minta **PERDANA MENTERI** menyatakan jumlah kad pelarian dikeluarkan sama ada UNHCR mempunyai kuasa untuk mengeluarkan kad tersebut dan langkah-langkah untuk mencegah pelarian dan pendatang haram daripada menjalankan perniagaan di Malaysia terutamanya di Selayang.
7. PR-1333-L70494
Datuk William @ Nyallau anak Badak [Lubok Antu] minta **MENTERI KEMAJUAN LUAR BANDAR DAN WILAYAH** menyatakan sejak lawatan YB Timbalan Menteri ke kawasan Parlimen P203 Lubok Antu pada 22 Julai 2015 apakah tindakan Kementerian untuk mengatasi kelewatan pelaksanaan projek bekalan elektrik ke kampung-kampung dan rumah panjang yang begitu lama tidak dapat disiapkan.
8. PR-1333-L70064
Tuan Wong Ling Biu [Sarikei] minta **MENTERI PENDIDIKAN** menyatakan sama ada masih terdapat kekurangan guru-guru yang beropsyen pengajian cina di sekolah-sekolah rendah yang beraliran Cina (SJKC). Apakah tindakan kementerian pelajaran yang telah diambil untuk menangani masalah kekurangan guru-guru tersebut.
9. PR-1333-L70585
Tuan Anyi Ngau [Baram] minta **MENTERI SUMBER ASLI DAN ALAM SEKITAR** menyatakan adakah pihak Kementerian bercadang untuk mengimplimentasi kaedah kawalan hakisan dan banjir yang efektif dan berkos rendah untuk penduduk kampung yang tinggal di kawasan yang telah dikenali mempunyai risiko tinggi hakisan tebing sungai seperti perkampungan yang terletak sekitar tebingan sungai-sungai besar di Sabah dan Sarawak.
10. PR-1333-L71097
Tuan V. Sivakumar [Batu Gajah] minta **MENTERI SUMBER MANUSIA** menyatakan sama ada Kerajaan berhasrat untuk meminda Seksyen 19 Akta Keselamatan dan Kesihatan Pekerjaan 1994 berkaitan dengan penalti bagi suatu kesalahan di bawah Seksyen 15, 16, 17 atau 18 yang mana hukuman atau/dan denda yang dikenakan adalah dianggap terlalu longgar dan tidak munasabah.
11. PR-1333-L70721
Datuk Noor Ehsanuddin bin Mohd Harun Narrashid [Kota Tinggi] minta **PERDANA MENTERI** menyatakan berapakah jumlah pelaburan yang dibuat oleh Tabung Haji dalam sukuk terbitan Bandar Malaysia.
12. PR-1333-L71064
Tuan Su Keong Siong [Ipoh Timor] minta **PERDANA MENTERI** menyatakan kedudukan dan pendirian Malaysia berkenaan dengan *Global Movement of Moderates Foundation* yang diilhamkan oleh Perdana Menteri pada tahun 2010. Adakah ia masih bersesuaian dengan pendirian Perdana Menteri yang menyokong himpunan Baju Merah pada 16 September 2015.

13. PR-1333-L69690
Datuk Hajah Norah binti Abd Rahman [Tanjong Manis] minta **MENTERI PERUSAHAAN PERLADANGAN DAN KOMODITI** menyatakan langkah-langkah yang telah diambil oleh Kementerian bagi mengurangkan kesan penurunan harga getah yang jatuh menjunam hingga RM2 sekilogram terhadap penoreh getah yang rata-ratanya berada di luar bandar dan menerima kesan langsung dari segi kedudukan ekonomi mereka.
14. PR-1333-L70830
Tuan Julian Tan Kok Ping [Stampin] minta **PERDANA MENTERI** menyatakan secara terperinci bagaimana peruntukkan di kawasan Parlimen Stampin (P196) digunakan. Sila senaraikan dalam jadual setiap peruntukan yang digunakan semenjak PRU13.
15. PR-1333-L69542
Dato' Haji Irmohizam bin Haji Ibrahim [Kuala Selangor] minta **PERDANA MENTERI** menyatakan adakah Kerajaan bercadang untuk menaikkan gaji minimum kakitangan awam yang mana kadar kenaikan gaji tahunan dikatakan tidak seimbang dengan kadar kenaikan kos sara hidup yang pantas sehingga mereka khususnya kakitangan sokongan iaitu kumpulan penjawat awam rendah terpaksa bergelut dengan keadaan semasa.
16. PR-1333-L71071
Puan Teo Nie Ching [Kulai] minta **PERDANA MENTERI** menyatakan sama ada Kerajaan setuju untuk mewujudkan Undang-Undang Khas bagi menangani salah laku penjawat awam (*public misconduct*) yang membuat keputusan dengan membelakangi peraturan serta kepentingan awam.
17. PR-1333-L71214
Dato' Hasbullah bin Osman [Gerik] minta **MENTERI KEMAJUAN LUAR BANDAR DAN WILAYAH** menyatakan apakah perkembangan terkini status bagi membangunkan sebuah lagi kawasan seperti Low Yat yang akan dijalankan di bangunan MARA.
18. PR-1333-L71444
Tuan Tan Kok Wai [Cheras] minta **PERDANA MENTERI** menyatakan :-
 - (a) jumlah warganegara yang layak untuk mendaftar sebagai pengundi menjelang akhir 2017; dan
 - (b) strategi yang diambil untuk mendaftarkan sebanyak mungkin pengundi baru.
19. PR-1333-L70954
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI SUMBER ASLI DAN ALAM SEKITAR** menyatakan rancangan Kerajaan untuk menangani masalah banjir di kawasan Wilayah Pantai Timur dan Wilayah Utara yang pada masa ini dilihat berlaku pada setiap tahun.

20. PR-1333-L70548
Tuan Sim Tze Tzin [Bayan Baru] minta **MENTERI DALAM NEGERI** menyatakan rancangan dan rasional Kerajaan yang ingin membenarkan 1.5 juta pekerja Bangladesh bekerja di Malaysia. Nyatakan jumlah pas pekerja yang dikeluarkan kepada pekerja Bangladesh tahun ini sehingga 30 September 2015.
21. PR-1333-L69824
Dr. Noor Azmi bin Ghazali [Bagan Serai] minta **MENTERI PENDIDIKAN** menyatakan apakah status semasa penguasaan 3 bahasa iaitu Bahasa Kebangsaan, Bahasa Inggeris dan Bahasa Mandarin ini dan apakah langkah dan strategi yang diambil untuk penguasaan ketiga-tiga bahasa ini mampu dicapai.
22. PR-1333-L70326
Tuan Wong Tien Fatt @ Wong Nyuk Foh [Sandakan] minta **MENTERI PENDIDIKAN TINGGI** menyatakan senarai bilangan IPTS di Sabah berbanding negeri-negeri lain dan berapa kursus dibuka di semua IPTS itu dan berapa pengambilan pelajar IPTS dan IPTA setiap tahun berbanding keperluan keseluruhan daripada graduan dari sekolah menengah di Sabah.
23. PR-1333-L70031
Datuk Wilson Ugak Kumbong [Hulu Rajang] minta **MENTERI KEMAJUAN LUAR BANDAR DAN WILAYAH** menyatakan status Jalan Nanga Mujong ke Nanga Gaat dan dari Rumah Juntan ke Rumah Bengau, Sg. Sut.
24. PR-1333-L69895
Dr. Azman bin Ismail [Kuala Kedah] minta **MENTERI DALAM NEGERI** menyatakan tentang rusuhan di Low Yat Plaza pada 13 Julai 2015 :-
- (a) siapakah dalangnya; dan
 - (b) berapa orang yang telah didakwa di mahkamah dan apakah hasil pendakwaan.
25. PR-1333-L69589
Dato' Abdul Manan bin Ismail [Paya Besar] minta **MENTERI KERJA RAYA** menyatakan kesan hasil pelaksanaan PLUS Malaysia Bhd. bagi sistem kutipan tol secara elektronik (ETC) sepenuhnya dan perancangan strategik dalam jangka panjang bagi membolehkan PLUS terus memberi perkhidmatan terbaik dalam penyediaan prasarana lebuh raya yang kondusif di negara ini.
26. PR-1333-L70453
Datuk Mohd Idris bin Jusi [Batu Pahat] minta **MENTERI DALAM NEGERI** menyatakan rasional dan sebab-musabab Kerajaan terus menerus membawa masuk pekerja asing ke dalam negara dalam keadaan ramai rakyat tempatan terutamanya belia-belia yang menganggur dan berhadapan dengan pelbagai masalah sosial. Bagaimana Kementerian hendak menangani persepsi rakyat yang Kerajaan lebih mengutamakan keuntungan pengusaha daripada menjaga kepentingan rakyat jelata.

27. PR-1333-L70550
Tuan Abdullah Sani bin Abdul Hamid [Kuala Langat] minta **MENTERI DALAM NEGERI** menyatakan benarkah ada keperluan untuk mengambil lagi seramai 1.5 juta pekerja asing sedangkan yang ada sekarang telah melebihi yang sepatutnya.
28. PR-1333-L70487
Tuan Mohamed Hanipa bin Maidin [Sepang] minta **MENTERI KEWANGAN** menyatakan :-
- (a) mengapakah George Kent (M) Bhd. (usaha sama dengan MRCB) diberi kontrak kerja-kerja PDP (*project delivery partner*) bagi pembinaan LRT Lembah Klang Line 3 LRT 3) selepas kontroversi syarikat tersebut dalam isu pembinaan LRT Ampang dan ketiadaan pengalaman pembinaan LRT dan pengalaman teknikal; dan
 - (b) adakah projek ini juga akan mengalami kelewatan sepertimana yang dinyatakan oleh Pengerusi George Kent (M) Sdn. Bhd. pada 30 Jun 2015.
29. PR-1333-L70304
Tuan Che Mohamad Zulkifly bin Jusoh [Setiu] minta **MENTERI PENDIDIKAN TINGGI** menyatakan sama ada terdapat perancangan untuk membina Institusi Pendidikan Tinggi Awam (IPTA) di daerah Setiu.
30. PR-1333-L70444
Tuan Wong Sze Phin @ Jimmy [Kota Kinabalu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan rancangan untuk menambah baik pengurusan sisa pepejal di Sabah terutamanya di bandar utama seperti Kota Kinabalu, Sandakan dan Tawau.
31. PR-1333-L70790
Datuk Rozman bin Isli [Labuan] minta **MENTERI PENDIDIKAN TINGGI** menyatakan adakah pihak Kementerian merancang untuk pembukaan kampus cawangan IPTA seperti UKM, UM, UIA dan seumpamanya. Labuan adalah tempat yang sesuai untuk dijadikan sebagai hub pendidikan tinggi yang akan menggalakkan integrasi nasional dengan lebih rancak.
32. PR-1333-L71333
Tuan Zairil Khir Johari [Bukit Bendera] minta **MENTERI PELANCONGAN DAN KEBUDAYAAN** menyatakan sama ada Kementerian bercadang untuk menguatkuasakan pengambilan wang deposit, jaminan bank atau insurans ke atas agensi-agensi pelancongan yang menipu pelanggan, dan jika tidak, mengapa.

33. PR-1333-L69528
Datuk Jumat bin Idris [Sepanggar] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan bilangan projek PPR yang akan dibina di Sepanggar dan berapa banyak projek yang terbengkalai di Sepanggar, jika ada.
34. PR-1333-L70402
Tan Sri Dato' Seri Abd Khalid bin Ibrahim [Bandar Tun Razak] minta **MENTERI PENGANGKUTAN** menyatakan sebarang perancangan menjadikan Pelabuhan Klang sebuah bandar raya pelabuhan bertaraf dunia serta pelan tindakan proaktif mendepani cabaran bagi semua pelabuhan di pesisiran Selat Melaka sekiranya cadangan membina Terusan Segenting Kra oleh Kerajaan China dan Thailand menjadi kenyataan.
35. PR-1333-L71177
Tuan Ahmad Marzuk bin Shaary [Bachok] minta **MENTERI KEWANGAN** menyatakan sejauh mana keberkesanan pelaksanaan Cukai GST dalam memacu dasar fiskal negara. Berapakah jumlah kes-kes penipuan GST yang dilaporkan, didakwa dan disabitkan kesalahan.
36. PR-1333-L70265
Tuan M. Kulasegaran [Ipoh Barat] minta **MENTERI DALAM NEGERI** menyatakan :-
- (a) jumlah orang termasuk Ahli-Ahli Parlimen yang telah dilarang oleh Kerajaan daripada melawat ke luar negara; dan
 - (b) berikan sebab-sebab tertentu terhadap larangan tersebut.
37. PR-1333-L69997
Tuan Haji Khalid bin Abdul Samad [Shah Alam] minta **MENTERI DALAM NEGERI** menyatakan status siasatan ke atas kes-kes berikut :-
- (a) insiden protes di depan Gereja di Taman Medan, Petaling Jaya; dan
 - (b) insiden protes di depan Plaza Low Yat, Kuala Lumpur.
38. PR-1333-L70843
Dato' Hasan bin Arifin [Rompin] minta **MENTERI PERDAGANGAN ANTARABANGSA DAN INDUSTRI** menyatakan :-
- (a) berapakah jumlah unit kereta semua model yang telah dikeluarkan dan nilainya serta jumlah kereta yang telah dieksport dan nilainya; dan
 - (b) berapakah jumlah yang telah dibeli oleh Kerajaan dan jumlah yang dijual kepada Bumiputera dan bukan Bumiputera.

39. PR-1333-L71532
Puan Hajah Fuziah binti Salleh [Kuantan] minta **MENTERI SUMBER ASLI DAN ALAM SEKITAR** menyatakan secara terperinci, usaha-usaha dan keberkesannya untuk memastikan bahawa aktiviti perlombongan bauksit di Kuantan, Pahang tidak akan membawa kesan yang merbahaya kepada alam sekitar serta penduduk setempat.
40. PR-1333-L70240
Dato' Haji Zainudin bin Ismail [Jelebu] minta **MENTERI PERDAGANGAN ANTARABANGSA DAN INDUSTRI** menyatakan kedudukan dan perkembangan terkini mengenai rundingan Perjanjian Perkongsian Trans Pasifik (TPPA) dan bilakah perjanjian ini hendak dimuktamadkan dan bila pula ia hendak dibawa ke Parlimen untuk dibahaskan.
41. PR-1333-L70039
Datuk Abd Rahim bin Bakri [Kudat] minta **MENTERI PERDAGANGAN ANTARABANGSA DAN INDUSTRI** menyatakan apakah Kerajaan akan memuktamadkan Perjanjian Perkongsian Trans Pacific (TPPA) dalam masa terdekat ini. Apakah intipati utama yang terkandung dalam perjanjian tersebut khususnya berkaitan dengan kedaulatan ekonomi Malaysia.
42. PR-1333-L70146
Tuan Wan Hasan bin Mohd Ramli [Dungun] minta **MENTERI KEWANGAN** menyatakan apakah sumber perolehan dan aktiviti pelaburan 1MDB bermula awal penubuhan sehingga Ogos 2015.
43. PR-1333-L70581
Dato' Ahmad Fauzi bin Zahari [Setiawangsa] minta **MENTERI PENDIDIKAN TINGGI** menyatakan apakah perancangan untuk mengurangkan jurang perbezaan yang tinggi antara pelajar lelaki dan perempuan dalam kemasukan ke Institusi Pengajian Tinggi.
44. PR-1333-L71199
Tuan Mohd Rafizi bin Ramli [Pandan] minta **MENTERI KEWANGAN** menyatakan senaraikan perbandingan nilai (dalam RM) setiap bon hutang Kerajaan Malaysia pada 30 September 2015 berbanding 31 Disember 2014 dan nyatakan kenaikan bayaran faedah (*coupon*) bagi setiap bon hutang bagi tempoh perbandingan yang sama.
45. PR-1333-L69607
Laksamana Pertama Mohamad Imran bin Abd Hamid (B) [Lumut] minta **PERDANA MENTERI** menyatakan bersediakah Perdana Menteri mengiktiraf Perkhidmatan Ahli Parlimen Bangsa Malaysia yang telah berkhidmat lebih daripada dua tahun supaya disokong untuk dikurniakan Darjah Kebesaran sekurang-kurangnya bergelar Datuk Kelas Ketiga oleh Seri Paduka Baginda Yang di-Pertuan Agong.
46. PR-1333-L70674
Dr. Haji Izani bin Haji Husin [Pengkalan Chepa] minta **MENTERI PELANCONGAN DAN KEBUDAYAAN** menyatakan statistik jumlah pelancong ke Kelantan untuk tempoh 5 tahun dari 2010 hingga 2015.

47. PR-1333-L70810

Tuan Gobind Singh Deo [Puchong] minta **PERDANA MENTERI** menyatakan sama ada wang sebanyak RM2.6 bilion dalam akaun peribadinya perlu dikenakan cukai dan telah dikenakan cukai dan sama ada Lembaga Hasil Dalam Negeri telah pun siasat perkara ini dan hasil siasatan itu.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. **Menteri di Jabatan Perdana Menteri**

- * Rang Undang-undang Majlis Keselamatan Negara 2015.

2. **Menteri di Jabatan Perdana Menteri**

- * Rang Undang-undang Profesion Undang-undang (Pindaan) 2015

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2016 (D.R. 31/2015) dan Usul Anggaran Perbelanjaan Pembangunan 2016 seperti berikut :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Dalam Jawatankuasa Sebuah-buah Majlis (30 November, 2015)

2. **Perdana Menteri akan mencadangkan :**

“ Bahawa Dewan ini membuat ketetapan di bawah Seksyen 10, Jadual Ketiga Belas, Perlembagaan Persekutuan bahawa draf bagi Perintah Perlembagaan Persekutuan (Persempadanan Bahagian-Bahagian Pilihan Raya) (Negeri Sarawak) 2015, (Kertas Statut ST.93 Tahun 2015), yang telah dibentangkan dalam Dewan ini pada 26 November 2015 bersama dengan Laporan Suruhanjaya Pilihan Raya bertarikh 19 Ogos 2015 mengenai Kajian Semula Persempadanan Mengenai Syor-Syor Yang Dicadangkan Bagi Bahagian-Bahagian Pilihan Raya Persekutuan Dan Negeri Di Dalam Negeri Sarawak Kali Keenam Tahun 2015, (Kertas Statut ST.92 Tahun 2015), dan yang akan dibuat di bawah Seksyen 12, Jadual Ketiga Belas, Perlembagaan Persekutuan untuk menguatkuasakan syor-syor yang terkandung dalam laporan tersebut, adalah diluluskan.”

3. **Menteri di Jabatan Perdana Menteri akan mencadangkan :**

“ **BAHAWA** Majlis mengambil maklum berkenaan peristiwa pencerobohan bersenjata di Kampung Tanduo, Lahad Datu pada 12 Februari 2013 oleh kumpulan yang dikenal pasti sebagai pengikut Jamalul Kiram III bagi merampas wilayah di pantai timur Sabah.

BAHAWA pencerobohan kumpulan tersebut ternyata telah mencabar kedaulatan Negara dan telah mengakibatkan kehilangan nyawa anggota keselamatan Negara.

BAHAWA sebagaimana yang telah dilaporkan di laman media sosial dan gambar yang dimuat naik oleh Puteri Jacel Kiram pada 9 November 2015, Yang Berhormat Lembah Pantai telah menghadiri pertemuan bersama dengan Puteri Jacel Kiram yang merupakan anak kepada Jamalul Kiram III.

BAHAWA Yang Berhormat Lembah Pantai sedia maklum bahawa Puteri Jacel Kiram menentang kedudukan Sabah sebagai sebahagian daripada Negara Malaysia dan sehingga kini masih menuntut negeri Sabah adalah milik Kesultanan Sulu.

BAHAWA pertemuan Yang Berhormat Lembah Pantai dan Puteri Jacel Kiram tersebut menimbulkan prasangka negatif dan tidak sensitif terhadap peristiwa pencerobohan Lahad Datu yang telah mencabar kedaulatan Negara.

BAHAWA pertemuan Yang Berhormat Lembah Pantai bersama dengan anak kepada dalang pencerobohan Negara telah dilihat bertentangan dengan angkat sumpah sebagai ahli Parlimen dan sumpah setia beliau kepada Malaysia yang telah berikrar untuk menumpahkan taat setia yang sebenar kepada Malaysia, memelihara, melindungi dan mempertahankan Perlembagaannya.

DAN BAHAWA tindakan Yang Berhormat Lembah Pantai tersebut merupakan suatu penghinaan kepada Majlis Mesyuarat yang turut mencemarkan nama baik dan prestij Dewan Rakyat.

MAKA inilah dipersetujui Yang Berhormat Lembah Pantai hendaklah dirujuk kepada Jawatankuasa Hak dan Kebebasan. ”

- | | | | |
|----|----------------|---|-----------------------------------|
| 4. | (D.R. 32/2015) | Rang Undang-undang Kewangan 2015 | Bacaan Kali
Yang Kedua |
| | | [Menteri Kewangan] | |
| 5. | (D.R. 28/2015) | Rang Undang-undang Perbadanan Insurans Deposit Malaysia (Pindaan) 2015 - Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”
(22 Oktober 2015) | |
| | | [Menteri Kewangan] | |
| 6. | (D.R. 33/2015) | Rang Undang- undang Tabung Angkatan Tentera (Pindaan) 2015 | Bacaan Kali
Yang Kedua |
| | | [Menteri Pertahanan] | |
| 7. | (D.R. 30/2015) | Rang Undang-undang Syarikat 2015 | “ |
| | | [Menteri Perdagangan Dalam Negeri,
Koperasi dan Kepenggunaan] | |
| 8. | (D.R. 29/2015) | Rang Undang-undang Skim Kepentingan 2015. | “ |
| | | [Menteri Perdagangan Dalam Negeri,
Koperasi dan Kepenggunaan] | |

9. (D.R. 34/2015) Rang Undang-undang Dadah Berbahaya (Langkah-Langkah Pencegahan Khas) (Pindaan) 2015. “

[Menteri Dalam Negeri]

10. (D.R.35/2015) Rang Undang-undang Persaingan (Pindaan) 2015 “

[Menteri Perdagangan Dalam Negeri, Koperasi dan Kepenggunaan]

11. (D.R. 36/2015) Rang Undang-undang Keselamatan Sosial Pekerja (Pindaan) 2015 “

[Menteri Sumber Manusia]

12. (D.R.9/2015) Rang Undang-undang Kanun Tatacara Jenayah (Pindaan) 2015 “

[Menteri di Jabatan Perdana Menteri]

13. (D.R.12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]

14. (D.R.24/2014) Rang Undang-undang Dadah Berbahaya (Pindaan) (No. 2) 2014 “

[Menteri Kesihatan]

15. **Menteri Kewangan akan mencadangkan :**

“ Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) Seksyen 56, subseksyen (5) Seksyen 17 dan subseksyen (3) Seksyen 18, Akta Cukai Barang dan Perkhidmatan 2014 supaya Perintah Cukai Barang dan Perkhidmatan yang dibentangkan di hadapan Majlis ini sebagai Kertas Statut bil. ST.83, ST.84 dan ST.85 bagi tahun 2015 disahkan ”.

16. **Menteri Kewangan akan mencadangkan :**

“ Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) Seksyen 11 Akta Kastam 1967 supaya Perintah Duti Kastam yang dibentangkan di hadapan Majlis ini sebagai Kertas Statut bil. ST.97, ST.98, ST.99, ST.100, ST.104 dan ST.105 bagi tahun 2015 disahkan” .

17. Menteri Kewangan akan mencadangkan :

“ Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) Seksyen 6 Akta Eksais 1976 supaya Perintah Duti Eksais (Pindaan) 2015 yang dibentangkan di hadapan Majlis ini sebagai Kertas Statut bil. ST.118 tahun 2015 disahkan”.

18. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang mengelarkan diri mereka sebagai SSKM ini.”

[Menteri Dalam Negeri]

19. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

[Perdana Menteri]

20. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini."

[Menteri Pertanian dan Industri Asas Tani]

21. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

[Menteri Kewangan]

22. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

23. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

24. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

25. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

[Menteri Sumber Asli dan Alam Sekitar]

26. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

27. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

28. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

29. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

30. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatgandakan usaha pembinaan rumah-rumah tersebut.”

[Perdana Menteri]

31. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

32. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa

posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

33. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

34. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat

bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

35. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

36. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dikedatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

37. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

38. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

39. **Dato’ Seri Dr. Wan Azizah binti Wan Ismail [Permatang Pauh]** akan mencadangkan :-

“Bahawa Dewan ini tidak ada kepercayaan terhadap Yang Amat Berhormat Pekan Dato’ Seri Najib Tun Razak sebagai Perdana Menteri Malaysia.”

[Perdana Menteri]

40. **Tuan Gobind Singh Deo [Puchong]** akan mencadangkan :-

“Bahawa mengikut Peraturan Mesyuarat 43 dibaca bersama Peraturan Mesyuarat 99 Peraturan-Peraturan Majlis Mesyuarat Dewan Rakyat, Dewan Yang Mulia ini mengkaji semula dan mengenenpikan keputusan Yang di-Pertua YB Dato Seri Dr. Ronald Kiandee, yang membenarkan usul untuk menggantung Yang Berhormat Tuan Lim Kit Siang, Ahli Parlimen Gelang Patah daripada Perkhidmatan sebagai Ahli Parlimen selama 6 bulan dibahas tanpa rujukan dibuat kepada Jawatankuasa Hak dan Kebebasan sepertimana menurut Peraturan 80A Peraturan-Peraturan Majlis Mesyuarat.”

[Perdana Menteri]

41. **Tuan Mohd Rafizi bin Ramli [Pandan]** akan mencadangkan :-

“Bahawa Dewan ini menggesa supaya Tenaga Nasional Berhad hanya membayar jumlah yang sepadan dengan nilai pasaran aset-aset *Independent Power Producers* (IPP) yang dimiliki oleh 1MDB dan Dewan berpendapat bahawa harga siling mengikut nilai pasaran bagi aset-aset itu adalah Ringgit Malaysia Lapan Bilion (RM8,000,000,000) sahaja”.

[Menteri Kewangan]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2015</u>	<u>RISALAT/DOKUMEN</u>	<u>TARIKH DIBENTANGKAN</u>
ST.112	Laporan Tahunan dan Penyata Kewangan Lembaga Pembangunan Industri Pembinaan Malaysia (CIDB) Bagi Tahun 2014	1 Disember 2015
ST.150	Laporan Tahunan dan Penyata Kewangan Lembaga Perindustrian Kayu Malaysia Bagi Tahun 2014	1 Disember 2015
ST.151	Laporan Tahunan dan Penyata Kewangan Lembaga Kenaf dan Tembakau Negara Bagi Tahun 2014	1 Disember 2015
ST.154	Laporan Tahunan dan Penyata Kewangan Lembaga Wakaf Hindu Negeri Pulau Pinang Bagi Tahun 2014	1 Disember 2015
ST.157	Laporan Tahunan dan Penyata Kewangan Agensi Inovasi Malaysia (AIM) Bagi Tahun 2014	1 Disember 2015
ST.159	Laporan Tahunan dan Penyata Kewangan Perbadanan Labuan Bagi Tahun 2014	1 Disember 2015
ST.160	Laporan Tahunan dan Penyata Kewangan Perbadanan Putrajaya Bagi Tahun 2014	1 Disember 2015
ST.162	Laporan Tahunan dan Penyata Kewangan Perbadanan Pengurusan Sisa Pepejal dan Pembersihan Awam Bagi Tahun 2014	1 Disember 2015
ST.163	Laporan Tahunan Jawatankuasa Khas Mengenai Rasuah 2014	1 Disember 2015
ST.164	Laporan Tahunan dan Penyata Kewangan Maktab Koperasi Malaysia (MKM) Bagi Tahun 2014	1 Disember 2015
ST.165	Laporan Tahunan dan Penyata Kewangan Suruhanjaya Koperasi Malaysia (SKM) Bagi Tahun 2014	1 Disember 2015

<u>TAHUN</u> <u>2015</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST.168	Laporan Tahunan dan Penyata Kewangan Perbadanan Tabung Pembangunan Kemahiran (PTPK) Bagi Tahun 2014	1 Disember 2015
ST.169	Laporan Tahunan dan Penyata Kewangan Kumpulan Simpanan Guru-Guru (KWSG) Bagi Tahun 2014	1 Disember 2015
ST.173	Laporan Tahunan dan Penyata Kewangan Suruhanjaya Syarikat Malaysia Bagi Tahun 2014	1 Disember 2015
ST.174	Laporan Tahunan dan Penyata Kewangan Perbadanan Harta Intelek Malaysia (MyIPO) Bagi Tahun 2014	1 Disember 2015